

東
華
續
錄

東華續錄

咸豐三十五

臣王先謙敬編

臣陶澐宣恭校

五月己亥朔諭軍機大臣等陳啟邁奏籌辦戰船五十隻因廣東解礮未到募勇未足請俟會國藩舟師駛出楚境再行約會夾剿等語此次江西籌辦戰船爲數無多以之遠出赴援雖形單弱若以備本省防剿之用儘敷調遣見在賊擾湖南會國藩舟師恐一時未能東下據該撫另片奏有賊船轉入饒河之語該省毗連湖北湖南處所均有匪徒出沒所有本省各隘口需用水師之處正復不少著該撫卽將已造船隻配齊礮械派員督率兵勇駛赴本省要隘以資防剿仍一面督飭趙如勝等趕緊訓練水勇一面於見造各船外陸續添造總期聲勢聯絡相機進剿不得株守一隅

置礮船於無用之地至廣東購備礮位並著該撫與葉名琛等妥商速辦以濟急需將此由六百里加緊諭令知之○安徽巡撫福濟奏據署壽州知州金光飭稟報擒首吉學盛陸早魁汪履詳張茂等久踞定壽交界之戴家集一帶嘯聚滋擾經團練委員郎中李文安知會該州並參將劉玉豹督率兵勇會剿李文安攻東路金光飭等攻西路三月十四日金光飭等由馬廠集前進擒獲擒首汪履詳及擒夥李六禿仔訊明正法燒毀匪巢二十餘處是日未刻行抵距戴家集附近地方金光飭等卽飭兵勇向前攻擊連奪匪巢三處該匪等併聚一處恃有澗溝之險放槍死拒我兵奮勇力戰互有傷亡劉玉豹隨帶之效力千總武舉劉開甲武生翟雲登首先帶兵搶過澗溝殺斃擒匪多名身受重傷猶復手刃數賊彈兵進追夥匪由南路接應橫放槍礮致劉開甲翟雲登均中

傷身死金光筋等親冒槍銃督兵衝殺該逆等始向東路逃去其計奪獲大槍二十餘桿殺死捻匪五六十名因東路匪黨甚眾李文安又未趕到未便窮追臣已咨給事中袁甲三前陝安鎮郝光甲督率該州縣盡力勦捕悉數殄除所有陣亡之千總武舉劉開甲武生翟雲登請旨飭部議卹得旨劉開甲翟雲登均著照例議卹○予安徽祁門陣亡知縣唐治等祭葬世職○追予浙江定海陣亡總兵官葛雲飛原籍建祠御書扁額○庚子諭內閣諄齡

奏遵旨查明承辦第穆寺事務達賴喇嘛請旨賞給名號一摺承辦第穆寺事務喇嘛濟克美當木垂人誠實明白徒眾心服辦理寺中事務妥協著照諄齡所奏濟克美當木垂著賞給管理事務扎薩克喇嘛名號以服眾心而資管束○諭諄齡代奏察木多帕克巴拉呼圖克圖之呼畢勒罕西瓦拉呼圖克圖因賊匪擾害各

處呈請祝禱頌經以祈速滅賊匪等語帕克巴拉呼圖克圖等因賊匪擾害各處情願帶領眾呼圖克圖喇嘛在察木多地方所有廟內專心念經祝禱速將賊匪殲除實屬出於至誠朕甚嘉悅著加恩賞給帕克巴拉呼圖克圖西瓦拉呼圖克圖哈達各一塊交駐藏幫辦大臣轉行賞給帕克巴拉呼圖克圖等○諭軍機大臣等諄齡奏廓爾喀國王呈遞表文請派兵隨同剿賊已檄諭該國王恪遵定制毋庸派兵助剿自應如此辦理該國王以邊外小邦情殷敵愾其愜忱亦自可嘉但內地小醜跳梁從無借助外夷之理著諄齡再行檄知該國王諭以表文業已上達大皇帝亦獎其誠惻惟念該國王久列藩封不忍令其派兵遠道跋涉且內地匪徒滋擾天朝兵力所加指日即可殄滅亦無須該國王派兵助剿務使寬嚴得中俾該國王內知感戴外絕覬覦自不至別有干求

所呈表底各件均著畱存將此諭令知之○以修西藏敏珠爾倫
濟珠布貝廟工竣賞噶卜倫旺曲揭布虛公爵紅寶石頂頒御

書廟額○辛丑諭內閣成郡王載銳奏請添局捐鑄錢文一摺見
在京師各項錢文除戶工兩局加卯鼓鑄外復經惠親王等捐鑄
鐵錢慶惠文瑞請鑄大錢以資搭放屢次推廣變通錢法足敷周
轉若復於各局外再行設局徒事鋪張有何實濟且各局紛紛鼓
鑄必有奸商謀利營私甚至官局私鑄漫無稽查於局務轉有妨
礙載銳所奏著不准行○孫瑞珍以病免調朱鳳標爲戶部尙書
趙光爲刑部尙書以彭蘊章爲工部尙書轉許乃普爲禮部左侍
郎以陶樸爲禮部右侍郎

由內閣學士遷

○子山東冠縣陣亡參領德祥

祭葬世職○壬寅諭內閣崇恩奏請飭前任學政幫辦勸捐一摺
向來各省辦理捐輸事宜責成在籍公正紳士幫同地方官勸辦

原以該員等素習民情爲里黨所推服可免吏胥擾累等弊候補庶子殷壽彭曾任山東學政與該省紳士不同各省學政係特簡之員考試是其專責並無管轄地方之任若特派該員前往山東勸捐不但無此體制且與各省責成在籍紳士勸捐辦理亦屬兩歧甚至轉有擾累閭閻崇恩所請著不准行其應如何勸諭捐輸之處仍著該撫慎選賢員會同各該地方公正紳耆妥爲辦理○僧格林沁勝保奏逆匪自竄踞連鎮堅匿死守誘之不出見在西岸長濠不日工竣卽飭各營沿濠紮營以資圍剿臣等酌商同時四面合攻使該逆應接不暇自易得手四月二十九日臣僧格林沁督帶馬步官兵攻撲賊巢東北西北二面臣勝保進攻西南賊營各斬擒賊匪百餘名及數十名不等惟時東北風作煙燄回吹又兼河隄之上風起沙揚未能得手是以督令收隊 上諭軍機

大臣等賊匪竄踞連鎮已越兩旬仍未殄滅朕心實深焦急勝保統帶得勝之兵於二十三日直抵連鎮已及十日正當與僧格林沁同心協力設法進攻以期迅殲羣醜如能遏令奔竄務當前截後擊設伏以待斷不准令該逆再踞他處致滋蔓延將此由六百里加緊諭知僧格林沁勝保並諭崇恩知之○勝保德勒克色楞崇恩奏查連鎮逆匪知東南一帶布置較密乘隙於五月初二日帶騎馬賊二千餘名從正東突出由甯津大路分竄臣勝保得信後傳知各營合力圍擊卽親督馬隊跟蹤追剿該逆先向許王村地方旋折而南取徑吳橋比及追至復折向西南因柘園鎮地方臣崇恩派有兵勇防堵又折向東南竄去臣德勒克色楞亦帶蒙古馬隊趕來會合前進其連鎮後隊賊匪由臣僧格林沁等相機剿辦臣崇恩於偵實後卽派兵分路進剿並飛飭地方營汛文武

一律嚴防

臣

崇恩因賊後隊尙在連鎖慮其續向南來未敢移兵

隨同南下

上諭勝保等奏逆匪被攻情急南竄一摺據稱逆匪

於五月初二日子刻帶騎馬賊二千餘名從正東突出由甯津大路分竄勝保親督馬隊跟蹤截剿該逆由吳橋柘園鎮一帶折回東南竄去德勒克色楞亦帶蒙古馬隊跟追逆匪分股南竄僧格林沁近在連鎖何以未據奏報勝保所奏僅云在平原恩縣一帶賊蹤究在何處亦未能確實指明逆匪詭譎異常又係騎馬逃竄其勢剽疾必須探明追剿迅速殄滅勿令占踞村鎮以致牽掣我軍逆匪係由連鎖東竄該處有培成那敷德在彼堵禦何以毫無知覺任令該逆肆行奔突培成營盤前在阜城被賊焚毀此次又復失事著僧格林沁確切查明培成那敷德如何貽誤情形據實嚴參迅速具奏連鎖賊匪既已分竄其勢益孤僧格林沁正當督

飭將弁乘勝進攻爲一鼓殲除之計如該逆全數南竄務卽督帶馬步各隊奮力追剿斷不可稍涉觀望致誤事機崇恩見派協領久祿由德州東南一路追剿候補參將定順等在恩縣一帶擇要設伏該撫見在德州仍當探賊所向相機截剿毋得專事株守其兗沂曹濟等處務當嚴飭地方文武迎頭截剿遏賊竄路則大兵跟蹤追擊更可得力逆匪竄後勝保已由德州馳奏而僧格林沁旣未撥兵進剿又未將如何竄出情形迅速入告此時若不趕緊將連鎮餘匪剋期殄滅自問當得何罪將此由六百里加緊諭知僧格林沁勝保並諭德勒克色楞崇恩知之○諭前因金陵籌攻緊要諭知王懿德於漳州雲霄等營挑兵二千名前往向榮軍營聽候調遣茲據王懿德奏漳浦雲霄各處雖屢獲勝仗而詔安銅山餘匪未清各營兵丁剿捕尙形單弱未便抽調並閩省見在剿

辦情形各一摺福建廈門克復後各州縣漸次蕩平惟地方新定人心未安非兵力彈壓鎮定不能弭變所奏自係實在情形該處官兵不敷分撥自應移緩就急以資勦辦逆首黃有使與林俊同居帽頂一寨屢被官兵擊敗所餘不過數百人著該督卽飭胡應泰鍾寶三等督兵進勦務將首逆黃有使林俊擒獲盡法懲治毋得徒事防守致該逆等乘間免脫至廈門餘匪黃位等游駛海中往來窺伺經李廷鈺等督飭師船跟蹤痛勦究未能悉數殲除所稱該逆等招納亡命意圖復擾並有赴援上海攻犯乍浦之說該逆等被勦勢窮難免勾結他竄著該督等卽飭水陸文武各員剋期勦辦毋令蔓延爲患一俟閩省軍務完竣卽遵前旨將前調官兵飭赴江南軍營交向榮調遣毋得藉詞延宕致誤事機將此由六百里加緊諭知王懿德並諭李廷鈺知之○山東巡撫崇恩奏

據荷澤縣知縣童正詩等節次稟報曹屬各股捻首併十三捻爲一捻並裹脅沿途游匪聚至三千餘人屯踞鉅鄆交界之沈家口欲先攻濮州次撲曹州府城經該處文武督帶兵勇分路圍剿羈斃賊匪數百名生擒呂秀城等八十六名千總郭齡鼇等手刃執旗賊目三人賊始奔竄兵勇追殺十餘里斃賊無數該匪等復在鉅鄆等縣與直隸開州交界之王家樓並鉅鄆接壤之呂家莊等處蟻聚數百人四出搶掠亦經兵勇剿捕殲斃賊匪千餘名生擒一百三十五名俱經訊明正法查曹屬捻匪素爲地方巨患此次乘逆匪竄擾膽敢併捻肆行圖撲府州城池實屬罪不容誅該文武各員統率兵勇實力剿捕辦理尙屬迅速見在逆匪被剿遠竄此股土匪又經擊散曹郡漸就肅清惟逸匪尙多難保不散而復聚必應乘此分竄之際按名搜捕臣已督飭在事員弁務將逸犯

盡數捕獲嚴行懲辦得旨仍著認真勦洗以後情形迅速具奏○
子山西殉節布政司經歷王殿魁等祭葬世職○癸卯諭內閣袁
甲三奏巡查李湘棻遇賊退避情形等語革員李湘棻前由山東
境內折回奏明駐守郝家集乃到徐後僅撥兵勇數百名前往該
處自帶兵勇安坐徐州追餘匪渡河奔竄百勝邀該革員同往追
勦該革員仍不肯前往僅以五百名勇付給百勝該勇行未數里
卽已潰散李湘棻本係獲咎之員經朕棄瑕錄用前次奏報乖謬
節經革去頂帶示懲復加訓飭尙冀其激發天良奮勉圖報乃防
賊則遠避鋒鏑追賊又畏葸不前貽誤事機實堪痛恨革員李湘
棻著卽發往軍臺效力贖罪其所帶之勇卽交百勝王夢齡派員
管帶並著察看各勇能否得力分別去畱酌量調遣○僧格林沁
等奏臣僧格林沁於五月初二日據勝保差人聲稱探得賊匪由

連鎮南面逃竄勝保會同德勒克色楞善祿就近帶同培成那敷德督領各路馬隊官兵跟蹤追擊生擒逆匪一名訊據供稱偽丞相林鳳詳帶騎馬賊一千名逃竄欲往臨清迎接南來賊匪該逆前隊騎馬賊約有二千餘名已由德州之東十餘里地方向南奔竄該大臣已督兵連夜追擊臣僧格林沁見分撥馬隊在東南西南列隊儻該逆續有竄逃卽可就近截剿至大股賊匪見在仍踞連鎮及附近各村臣等惟有激勵將士相機進剿上諭軍機大臣等本日據僧格林沁馳奏各情與勝保所奏不符是否培成前因失事獲咎此次與那敷德防堵東面恐負罪更重遂以賊由南面竄出飾詞具報該大臣不察虛實據以入奏且勝保於二十三日到達連鎮後其善祿帶領步隊於何日到營未據僧格林沁等奏及此次勝保摺中亦不言會同善祿跟追培成那敷德不能遏賊

竄逸任令該逆由甯津吳橋直奔恩縣平原一帶勝保亦不言就近帶同該二員南追之事該大臣雖駐兵連鎮北面相距非遙何以所探情形毫無確信可見該大臣與勝保共辦一事聲勢絕不聯絡以致圍攻不密該逆得乘閒脫逃蔓延他處實所不解至該大臣分撥馬隊在東南西南列隊防賊續竄固屬要著惟不可徒事分防毫無把握甚至區分畛域以追勦委之他人冀圖卸責該大臣等均經朕特簡辦理軍務若不能和衷商榷迅速勦捕何日始能了事該逆精銳既已南竄且賊目亦已逸出所有連鎮餘匪著該大臣督率各營剋日籌攻務期悉數殄滅萬不可再令分股奔突冀直境肅清便謂可以塞責仍將諭詢各情形詳查速行奏聞該大臣秉性質直勿爲人所蒙蔽率行人告致負委任將此由六百里加緊諭令知之○諭袁甲三奏江甯賊船竄擾和州一摺

琦善向榮雖分勦江南江北而所辦實係一事自應無分畛域設法疏通江路使逆賊聲勢隔絕庶勦辦較易得手乃金陵賊巢迄今負嵎如故瓜州殘寇又復牽掣我師而由揚州江甯竄皖之匪大股仍踞廬州其舒城桐城等縣攻克亦尙無期見復連艘上駛竄入和州並分股擾及含山又於江浦縣張貼僞示煽惑人心該州爲南北衝要距廬州定遠均屬相近萬一與廬賊會合併圖北竄勢將不可收拾此時總以合力扼截遏其竄路爲第一緊要琦善前次畱防宿遷之馬步官兵一千餘名本爲防山東竄匪而設見在已酌量撤回著琦善將此項官軍迅飭原帶之都司羣壽副都統德崇額等全數統帶馳赴和州相機防勦江浦六合防兵亦可就近援應毋得遷延貽誤致失事機向榮近在對岸應如何酌量分兵渡江至滁和一帶截勦務卽迅速籌辦不得以株守堅城

遂置江北大局於不問見在各路賊情披猖至此該大臣等坐擁重兵任令逆蹤紛突肆竄是徒有勦賊之名實甘蹈縱賊之罪天良尙在能勿捫心自愧乎將此由六百里加緊各諭令知之○甲辰諭軍機大臣等勝保等奏竄匪奔入高唐州請飛調大營步隊官兵各摺片昨有旨續詢僧格林沁何以並不撥兵進剿並令將連鎮餘匪趕緊肅清此時竄匪已於初三日突入高唐州城閉門拒守勝保帶到馬隊不過數百餘名沿途殺斃長髮老賊數百名跟蹤趕至該州東關街內截殺因該州兵勇無多並未準備城門大開致該逆得以占踞見在培成那敷德雖已帶馬隊與德勒克色楞趕到分布城廂四面惟訊據獲賊供稱有占踞東昌濟甯之意必須迅速添兵勦辦方不至再有蔓延並據賊供此股係逆首李開芳帶賊先行林鳳詳尙在連鎮而勝保追剿之兵並無步隊

亦無礙位著僧格林沁迅撥步隊精兵千名星夜趕赴高唐飭令
剋期到齊不得稍涉遷延應帶礙位亦卽設法攜帶並著飛飭善
祿仍令馳往勝保軍營會剿並可統領步隊前行至連鎮賊匪尙
有首逆在內尤當迅籌攻克不得更令乘閒免脫本日據載齡奏
探初二日賊眾係向東面逃竄是連鎮東面堵禦不力確有可憑
該大臣當嚴飭各營面面兜圍風雨昏夜尤應加意防範總期卽
日掃除淨盡勿畱餘孽爲要將此由六百里加緊諭令知之○諭
勝保德勒克色楞奏追賊至高唐州逆匪入城抗拒見籌攻剿一
摺該逆乘馬逃竄雖甚剽疾究在恩縣腰站均有逗畱崇恩所派
參將定順遊擊文英設伏之兵何以未見要擊高唐州城兵勇雖
單該州知州究在何處何以我兵在關廂殺賊尙不知閉門拒守
殊出情理之外此股竄匪無論有無逆首在內總宜迅速剿滅若

稍事耽延使賊喘息已定不但南奔濟甯東昌爲可慮卽該州城內之人被其裹脅勦辦亦已不易且恐連鎖之賊再有續竄勝保大軍必至腹背受敵見在已諭僧格林沁照勝保所請迅撥步隊前往接應善祿步隊官兵於何時馳抵連鎖此次曾否折回南路疊次奏報未據敘及今勝保處既急需步隊卽可令該將軍統帶前往仍合爲一軍以資得力連鎖至高唐州尙有二百餘里恐步隊行走稍遲所調就近地方兵勇著崇恩迅速撥往不准片刻遲延附近各處有存營大礮比之大營調運較爲近便者亦著飛調解往總以神速爲要東昌濟甯皆係繁富之區水陸衝途極關緊要崇恩見在德州所有東昌濟甯防守事宜卽責成崇恩督飭屬恩官黃良楷等嚴密防備多設偵探一聞賊蹤入境卽與大軍前後夾擊儻有疏失惟崇恩是問不得專諉之地方文武也本日復

諭百勝王夢齡酌撥兵勇渡河迎截著勝保一併飛催前來統歸
調遣其高唐州文武下落卽著迅速查明如有逃避情事卽行嚴
參治罪將此由六百里加緊各諭令知之○諭本日復據勝保等
馳奏該逆於初三日竄至高唐州入城堅拒經勝保等派撥馬隊
馳赴柱平設伏截剿惟逆勢剽疾利在奔突若堵剿稍遲該逆由
山湖兩路直趨而南則豐沛一帶適當其衝一經乘虛偷越渡河
必致復肆鴟張仍圖北犯此時惟當前後來擊務將此股兇悍老
賊就東境截殺無遺方爲上策百勝王夢齡前奏備防兵勇尙不
單薄各屬紳耆自練民勇亦均可協同攻守著百勝等於接奉此
旨後一面派撥兵勇嚴扼黃河要隘一面飛探賊情相機渡河於
北岸迎剿總期併力兜圍毋任再有竄逸儻河防稍有疏虞堵剿
不力任令賊蹤闌入朕惟知以軍法從事勿以節次嚴旨視同具

文也懷之○諭陳啟邁奏赴楚援兵遇賊接仗失利折回義甯州城見籌防勦等語前因湖北崇陽通山一帶賊眾肆擾其地與義甯接壤疊經諭知該撫迅催帶兵赴楚之羅玉斌星速前進茲據奏稱該副將於江楚交界遇賊接仗失利折回義甯是楚省賊匪已闖入江西邊境著卽嚴飭羅玉斌督兵竭力固守萬不可令該處州城再失致干重咎該撫所派贛州兵勇馳往協防務當飛速前進不准稍有延誤俟將竄入江境之賊擊退淨盡仍飭羅玉斌帶兵赴楚將崇通匪徒協力勦除以爲楚省援應所有解往湖北餉銀並應解金陵兵餉均著悉心籌畫設法運往不得因道路梗阻任意稽延致誤要需至各省照例陳奏之事自應專弁齎京不准擅用驛遞該撫奏報軍情將按月例奏之事附入實屬有違定例嗣後務當分別緩急不准因內有一二件閤涉軍餉之事一概

擅用驛報也將此由六百里加緊諭令知之○諭王懿德奏鈔法不宜紛更並請停鑄鐵錢鉛錢各摺片據稱戶部咨令各省殷實之家捐貲助餉有不願邀議敘者由官照數發給銀票准俟軍務完竣後赴各省司庫領銀雖爲廣勸捐輸起見惟事涉紛更更恐於鈔法有礙所奏自屬實在情形京局鐵錢見經試鑄因滇銅運解道路梗塞採買銅斤爲數無多不能不權宜辦理以廣鼓鑄而濟兵餉至鉛錢京局見未鑄造該督奏稱恐致私鑄日增物價驟長諸弊亦不爲無見該省卽著毋庸鼓鑄鐵錢至該督前奏福建省城開設官錢鋪試用銀錢票並擬於廈門等處添設官鋪一切章程尙屬周妥仍著王懿德督率在事人員等認真經理各省情形不同補偏救弊要在隨時隨地斟酌籌辦見在度支匱絀而京師放款尤多非廣鑄大錢疏通鈔法無以濟急該督果能悉心講

求於該省行之有效朕方且以該省章程推行各省非獨於事有窒礙之處不强該督以所難也將此由四百里諭令知之○以不諳清語革 福陵總管西拉布職○乙巳諭內閣奕山奏庫爾喀拉烏蘇土爾扈特盟長守護郡王印信喀屯鄂勒綏德勒格爾情願捐輸馬匹呈請轉奏請旨一摺土爾扈特盟長守護郡王印信喀屯鄂勒綏德勒格爾呈稱內地見有軍務因伊子郡王巴圖尙未及歲未能前往軍營效力情願捐馬三百匹以備軍需實屬出於至誠殊堪嘉尙惟念該王等自係賴此項牲畜過度所捐馬三百匹著毋庸賞收用示朕體恤蒙古至意○僧格林沁等奏查連鎮之賊雖有潰逃其大股逆黨仍前死拒初三初四等日乘夜攻撲東南長濠西凌阿明慶督帶官兵奮力攻擊斃賊不計其數臣善祿聞賊竄往東南隨帶步隊同蘊秀所帶吉林馬隊尋蹤追趕

沿路隨問鄉民據云賊東赴吳橋由陵縣竄至恩縣騎馬賊約一千數百人每過鄉莊偪脅民人牽馬聽用節節替換聞有兵追復由恩縣向南逃奔是大股賊匪尙在連鎮圍剿仍當喫緊計逃出之賊至多不過二千人有勝保等足資剿辦臣部馬隊已交福秀帶領緊追臣於初四日仍折回軍營上諭軍機大臣等逆匪攻撲長濠雖經我兵擊敗回巢而賊情詭譎仍恐聲東擊西再圖乘虛竄逸見在賊踞高唐州城雖經勝保等跟蹤追剿已成尾追之勢設連鎮逆匪再行竄出不惟勝保一軍腹背受敵且恐沿途裹脅兇燄復張剿辦又形棘手該大臣總當督飭將弁迅將此股餘匪就地殄除即使誘令離巢亦當設伏要截斷不可任其四路狂奔或另踞村莊以致蔓延爲患勝保所帶官兵全係馬隊此時逆匪竄踞城池必須步隊官兵協力攻剿著僧格林沁仍遵前旨迅

撥步隊精兵一千名酌帶礮位卽交善祿統帶星夜趕赴高唐州
與勝保德勒克色楞合力攻擊萬勿遲延致誤事機將此由六百
里加緊諭令知之○守護 東陵貝子載容等奏畿輔肅清請裁
撤加添守護 東陵兵丁允之○以高唐州城被賊竄陷巡撫崇
恩下部議處○丙午勝保奏派兵圍攻高唐逆匪情形得旨布置
俱是迴非前在豐縣自詡氣象勝保真可教也勉力妥速勦辦以
副朕委任之苦衷也又奏防連鎮之賊續行南竄於要路設伏可
以痛加懲創批殊不可料之太易○予山東陣亡未入流徐鳳誥
祭葬世職○丁未諭內閣端華全慶奏天津紳民具呈請繳銀錢
兌換官票錢鈔一摺著照所請於天津設立分局令該紳民等徑
赴該局呈繳銀錢領取票鈔毋庸由縣轉呈以歸簡易所換票鈔
准該紳民等遵照戶部章程於交納地丁鹽課關稅及一切交官

款項內搭交五成所收銀錢暫存運庫作爲收買海運餘米之用其餘銀兩仍報部候撥此事卽著文謙悉心經理務期於倉儲鈔法兩有裨益○兵部奏鄭魁士開復副將可否免繳捐復銀兩得旨鄭魁士著免其加捐嗣後凡原在軍營之人偶獲愆尤旋因奮勉保奏著不必加捐其因別項革職後自赴軍營投效者不得援以爲例○以廣東紳士捐助紅單船經費永廣廣州府文武學額各四名○戊申 上詣 大高殿祈雨○諭軍機大臣等逆匪由金陵揚州上竄湖北湖南旁擾江西安徽皆以擄船爲事沿江一帶毫無阻截琦善向榮僅於陸路進攻又不能剋期收復致令賊艘來往自如若不急圖肅清江面何日始能蕺事朕聞逆賊又有搶奪商販木簠造船添礮情事如果屬實江面賊船愈眾瓜州艇師船旣無多且在下游湖南江西師船又皆爲本省賊匪牽掣聲

勢不能聯絡因思廣東所調紅單船日內當可駛入大江若將此項船隻與見存各船分作三起前起駛過金陵駐泊兔兒磯以截江安往來之船中起駛赴瓜州以上駐泊土橋與琦善大軍合剿瓜州後起仍泊焦山以防下竄瓜州一經克復即將後起之船上偪五龍山觀音門一帶堵剿中起之船上泊兔兒磯與向榮大軍夾攻金陵前起之船駛赴攔江磯安慶一帶進剿並知照和春福濟瀕江設伏爲暗燬賊船之用似此節節堵截使賊不至肆行無忌陸路諸軍方可得手若瓜州廬州兩處克復一路自鎮江沂流而上一路自安慶沿流而下會剿金陵傾其巢穴自不難逐漸掃除琦善向榮頓兵大江南北並未攻克一城爲朕分憂朕博採眾論審度機宜非用水師橫擊江面不能制賊之命見在紅單船隻爲數不少礮勇均可得力著琦善向榮於接奉此旨後安速會籌

迅卽密商布置此係江面全局非專爲東南三城起見該大臣等
如有善策較此辦法尤爲扼要者亦著速議奏聞總期水陸兼籌
不分畛域以清江路而殄妖氛將此由六百里加緊各諭令知之
○諭據官文等奏宜昌失守荆州情形緊急一摺逆匪前撲荆州
經官文等督兵堵剿獲勝乃於三月二十日分三股攻撲宜昌府
城該鎮府等出城轟擊斃賊多名旋即上城守禦賊眾於次日聚
至三千餘名二十二日城身因雨塌卸丈餘賊匪卽由缺口突入
因而失陷此股賊匪是否卽由荆門荆州而來抑係湖南潰散之
匪沿江而上統計三千餘名其中土匪勾結與裹脅良民數必不
少是長髮真賊無多若不趕緊掃除恐愈聚愈眾致令上竄襄樊
於北路關繫尤爲喫重且該郡爲由川入楚門戶此時各鄰省接
濟餉需調撥兵勇均屬緩不濟急惟四川相距較近可以藉資接

應裕瑞所奏駐紮巴東利川之兵於四月中旬尙未據報啟程赴援本日復降旨嚴催裕瑞迅飭此項官兵兼程前赴宜昌俟此股賊匪掃蕩後再行酌量何處緊要派往調遣仍由官文就近派員迎提如帶兵之總兵雙保福忻有意遷延不進卽由該將軍嚴參治罪台湧青馨均有地方之責雖距該處較遠亦當妥籌兼顧豈得專管一隅於荆襄險要情形竟置不問楚境賊匪疊陷郡縣若再令蔓延該督撫自問當得何罪昨據裕瑞奏撥銀十萬兩於四月初八日啟程赴楚見在川楚道塞著官文台湧派員繞道迎護催提毋稍疏虞本日王慶雲奏籌銀一萬兩由商南轉解襄陽一併迎提以資接濟將此由六百里加緊諭令知之○諭前以楚省賊氛甚熾諭令裕瑞將派防巴東等處之松潘建昌兵二千名令雙保等統帶赴楚助剿正月以來疊經嚴諭飛催已不下五六次

昨始據裕瑞奏稱遵旨派往仍未將啟程日期奏報川楚壤地毗連剿楚省之賊匪卽以固川省之藩籬裕瑞於奉撥官兵延不催令前往是於事勢綏急全未審度且此項官兵若於奉撥後卽行赴楚協剿則安陸荊門等處不至失事又何至賊匪擾及宜昌裕瑞旣已遲誤於前若復心存畛域罪將誰諉見在荊州待援甚急著裕瑞迅飭雙保福圻統帶前項官兵卽日兼程前進所派赴台湧軍營之練丁一千餘名並著飭令先赴荊州聽候官文調遣本日已諭令官文將此項官兵飛檄迎提若再有遷延情事卽將雙保福圻等嚴參治罪以肅軍令其官兵練丁等糧餉仍著源源接濟毋許遲誤前次撥往湖北省餉銀十萬兩並著飛催委員安速解往知照官文派員迎提毋稍遲誤該督接奉諭旨後著卽將該官兵練丁等出境到楚日期及如何派撥巴東利川接防官兵之

處迅速由驛馳奏將此由六百里加緊諭令知之○諭陳啟邁奏
湖北逆匪竄擾武甯見籌援剿一摺前據奏稱逆蹤甫經退出湖
口復又擾及九江而楚北崇通等處逆匪闖入江西邊境羅玉斌
赴援楚省之軍致遭挫衄折回義甯覽奏已深焦急茲閱陳啟邁
陳奏各情武甯縣境又有由楚竄入逆匪勾結肆擾勢甚猖獗該
處逼近義甯界連楚北各要隘見在全楚賊氛方熾而江西袁州
瑞州九江等屬均有賊匪分竄若剿辦稍有稽延致該逆愈聚愈
眾南昌省垣重地亦不免因而震動該撫身膺疆寄務當計出萬
全迅籌扼剿之策一面添撥兵勇分投堵截一面激勵紳團協同
守禦尤應隨時隨地嚴緝土匪盡法懲治以免到處勾結庶可消
患未萌其近省水陸要隘並著嚴密設防以固根本仍嚴飭勸辦
團練及帶領兵勇之林懋勳陶璽等設法固守武甯縣城務將此

股竄匪相機殄滅勿令蔓延所有此次陣亡之已革知府劉熾昌等並其餘員弁著確切查明一併請卹另片奏九江德安及萍鄉等縣匪徒合水陸兩路滋擾情形該撫仍須妥籌策應並分飭所屬實力堵剿不得稍涉疏虞將此由六百里加緊諭令知之○值格林沁奏遵撥兵勇派善祿帶赴勝保軍營報聞○永定河隄合龍○己酉諭內閣勝保等奏督兵攻剿賊匪獲勝一摺據稱逆匪竄踞高唐州城立柵築壘意圖堅拒經勝保督飭兵勇直攻東關德勒克色楞進攻南關培成那敷德進攻西關將木柵全行焚燒賊黨敗竄入城等語此次逆匪南竄經勝保等督帶馬隊跟蹤追剿該逆不暇分踞村莊全股奔入高唐州城我兵復將城外關廂賊壘盡行燒毀逆眾死踞孤城其勢已極窮蹙著勝保等乘此聲威督飭弁兵迅將此股賊匪就地殲除毋令再有竄逸○諭軍機

大臣等勝保等奏督兵進擊焚燬木柵斃賊多名一摺逆匪困守孤城其勢益蹙正可乘機設法進攻勿令乘閒脫逃致剿辦又形棘手連鎮南路空虛該逆知我軍圍攻高唐必亟思南竄以冀兩股會合該大臣見已咨調吉林馬隊五百名並抽撥正定營兵一千餘名趕赴高唐其連鎮南路仍當設法兼顧斷不可使此賊續來致我軍有腹背受敵之患昨據僧格林沁奏稱善祿已於初九日馳往勝保軍營此項官兵應於何處防剿著該大臣迅即籌畫總期扼要堵截毋得顧此失彼勝保近日奏報尙無矜張自滿之意身爲統帥自應如此戒慎嗣後益尙加勉毋稍大意汝旣知無待督責卽當實踐斯言以副委任是所望於該大臣也另片奏請將徐州兵勇擇要據守等語著卽傳旨飛飭百勝王夢齡於兵勇渡河後卽在豐沛所屬及黃河口岸扼要嚴防聽候調遣將此由

六百里加緊諭知勝保並諭德勒克色楞知之○諭向榮奏金陵
疊次堵剿情形並飛催紅單戰船先清江面一摺我軍自四月十
八日起連日攻打太平朝陽各門並轟擊雨花臺賊營雖小有斬
擒而該逆恃其壁壘高厚濠塹重疊總欲堅匿以老我師若但以
陸路兵勇與堅城猾寇相持殊非籌畫全局之策該大臣因勦辦
未能得手欲先淨埽逆踪肅清江面斷賊應援擬先勦洗瓜州趁
勢南向夾攻克復鎮江至金陵賊船尤眾必須大幫戰船方足痛
加掃蕩所奏機宜朕亦豫見及此是以昨諭琦善向榮將前調紅
單船隻並見存各船酌量布置俾瓜州鎮江等處以次克復方能
直駛上游制賊死命與和春等會合同擣金陵破其巢穴該大臣
既接葉名琛咨會知紅單船計日可到著卽與琦善籌商速行專
弁往上海迎提並一面飛咨閩浙江蘇各省督撫轉飭沿海文武

催趣進口其水陸各路應如何併力夾攻之處著與琦善協力同心毋得區分畛域再誤事機至上海賊匪燒毀我兵營盤一節前據許乃釗奏因該處游匪勾結夷人所致經吳健彰勸諭後尙屬安帖等語朕聞上海起釁實由我處兵勇戲侮夷婦並有搶奪米船等事激憤生變該撫坐船先退致令兵勇潰散許乃釗前奏是否有心掩飾著向榮確查密奏不准稍有瞻徇回護自干咎戾將此由六百里加緊諭令知之○予山東高唐殉難知州魏文翰祭葬世職○庚戌諭內閣內閣侍讀學士德奎奏請於南苑開墾屯田辦理團練一摺南苑爲我朝肄武之地屢經禁止私墾乃德奎率請招募民勇辦理團練並請將隙地准令民戶耕種所奏顯係受人慫恿巧藉團練之名以遂其牟利營私之舉且明知御史嵩齡曾有開墾南苑閒地之奏交部議處輒敢詭詞瀆請罔上濟私

尤屬膽大德奎於上年違例保舉降調副指揮朱森並請查收旗戶絕產種種乖謬疊經降旨申飭乃不知悛改仍敢逞私妄言狡詐已極德奎著交部嚴加議處原摺著擲還○以袁甲三爲左副都御史

由給事中遷

○辛亥諭內閣京師入夏以來雨澤稀少節經降

旨設壇祈禱並親詣

大高殿

時應宮拈香復派惠親王綿愉

等分詣

三壇虔禱雖得雨數次尙未深透近畿一帶望澤尤殷

朕宵旰焦思時勤修省因思清理庶獄冀可感召天和所有刑

部及順天府見在收審人犯或因日久未經定案囹圄羈禁以致

疾病顛連情殊可憫著該衙門督率承審各員將已結未結各案

逐一清釐其有情節可矜甚至含冤莫伸務當悉心推求卽予平

反至問徒以下輕罪人犯以及干連傳案待質者立予清釐省釋

毋任稽滯積壓拖累無辜此外尋常案件並著速行審結免致遷

延庶期翁應祥和甘膏渥沛該衙門卽遵諭行○諭蔣蔚遠奏官軍進剿獨山匪徒疊獲勝仗一摺獨山州匪徒楊元保等前經官兵擊敗後仍占踞下司地方經署參將英志會同委員署通判韓超等統帶兵練進剿直搗播讓拉旺賊巢斃賊數十人賊匪退據懸巖石硐官兵奮勇前進殺斃硐中賊匪百餘名生擒六十名維時下司匪黨來援卽用知縣徐河清遊擊楊廷柱分隊迎擊斃賊百數十名餘匪竄赴四寨等處復經千總任得貴縱火焚巢生擒匪犯十七名燒斃六十餘人訊知楊元保及其子楊亞三均已逃竄英志等卽飭委員侯雲沂前往汪籠剿捕殲斃匪黨百餘名楊亞三正奔竄間被練總周承恩擒獲正法其另股匪徒竄往牯化牯琴等處經訪波縣知縣李琛遊擊馬清傑協力圍剿斃賊無數生擒李老椿等二十六名另有粵匪數百名自洪水江順流而下

爲楊元保應援亦經羅斛州判劉昇平督同練總羅屏藩等督兵
殺斃數十名餘俱竄回粵西該匪徒等勢已窮蹙著將霽遠飭令
在事文武乘此聲威迅將首犯楊元保拏獲其餘匪黨務須一律
殲除毋任竄逸以靖地方○壬子諭內閣台湧舒倫保奏剿辦應
山賊匪大獲勝仗一摺湖北逆匪經台湧疊次剿除並收復德安
雲夢等處該逆旋由安陸竄至隨州復由隨州回竄應山本月初
五日台湧督率兵勇於縣北八里沖一帶相度地勢派都司平德
帶領陝甘兵爲頭隊都司葉永泰等帶領湖北兵爲中隊舒倫保
親率西安等兵爲後隊復派署應山縣知縣聶光鑾帶領鄉勇分
爲左右兩翼防賊旁鈔並派帶勇之增生王熙於楊家岡地方僻
路埋伏鄉勇防賊偷竄是日賊眾有四五千由東北山後蜂擁
而來直撲官軍前隊我兵亦分爲五路剿殺應山鄉勇從後追擊

賊眾拋棄馬匹四散奔逃我兵殲擒賊匪無數其逃脫者由楊家岡僻路偷竄適遇伏勇截殺多名並經鄉勇擊斃無數統計鏖戰六時之久經我軍痛加剿洗殲擒殆盡所有在事文武員弁兵勇著台湧舒倫保擇尤保奏仍著台湧等督飭官兵乘勝進攻漢陽漢口務將楚北賊匪悉數掃除毋任再滋蔓延○諭軍機大臣等台湧舒倫保奏隨州賊匪回竄應山經官軍剿殺殆盡見擬分兵進剿一摺此時賊匪以漢口漢陽爲巢穴武昌省垣重地聲息懸隔急望救援而安陸荊門宜昌均已失陷該督專駐應山誠爲非計見據奏稱擬由德安進兵爲直搗漢陽之舉自應迅速進剿以通大江南北之路台湧另片奏出力官員請格外獎賞等語弁兵打仗出力自應由統兵大臣隨時激勵或指名保奏或賞給翎頂功牌均無不可斷無請旨定一賞格之理所有此次出力官兵除

明降諭旨准其酌保外其餘仍著台湧舒倫保自行酌獎以勵軍心崇倫見已革職所請飭令舒倫保與佈克慎合兵速剿漢陽之處卽著台湧等按照此次寄諭各情妥商籌辦將此由六百里加緊各諭令知之○諭據台湧舒倫保奏會剿隨州竄回應山之賊殲擒殆盡一招該督等卽由德安一路移兵南向爲進攻漢陽大股賊匪之計見在楚北逆眾仍踞漢陽漢口爲巢穴自應直搗賊巢破其堅銳方能解武昌之危本日已諭令台湧舒倫保相度機宜督師前進惟武勝黃土等關爲由楚入豫要隘桐柏唐縣各屬亦緊與楚境毗連大軍一經南指則北路門戶空虛且前次由棗隨下竄逆匪仍踞擾安陸荊州一帶均不可不嚴密籌防以固豫省藩籬英桂見已銷假全豫防守事宜責無旁貸楊需有協同防守之責前據奏稱察看何路緊要卽往何路嚴防著卽統帶見有

兵勇剋日馳赴武勝關一帶扼要駐守妥籌堵剿柏山係本省專閩大員前以兵力單弱不克出境迎剿仍駐新野縣屬防禦邊界並著英桂楊需隨時酌量調遣不得任令該總兵飾詞巧避貽誤事機其歸陳光固一路與皖楚交界處所仍責成徐廣緒牛鑑認真堵截務須聯絡聲勢以期周密至連鎮分竄高唐之匪仍恐伺隙南奔冀圖裹脅沿河各要隘尤宜嚴飭文武營汛分督兵勇實力巡防不准稍涉懈弛令該逆偷越渡黃致干罪戾將此由六百里加緊諭令知之○以畱防託病革前任湖北巡撫崇綸職○癸丑諭軍機大臣等許乃釗奏轟塌上海城垣因遇雨未能攻克一招覽奏曷勝焦急許乃釗攻剿上海賊匪師久無功吳健彰所帶拖幫夾板等船未能得力徒以雨勢過猛退潮奔放不能上駛爲詞是水陸兩軍均屬毫無把握似此糜餉老師日復一日貽誤遷

延罪將誰諉據稱逆匪股數既分頭目遂多宜於用閒等語可見該撫於勦辦事宜漫無定見不過藉此耽延希圖搪塞前次誤聽撫議致失事機該匪詭譎異常豈可再蹈覆轍該撫惟當督飭水陸兵勇奮力進攻萬不可墮賊奸計怡良等另摺奏軍餉緊急請飭於各省籌撥銀四五十萬兩等語見在各省亦多辦理軍務紛紛請餉豈得專顧江南該督撫仍當於江蘇省地丁稅課設法徵提勸諭捐輸妥爲辦理見在京師兵餉均以錢抵銀支放添鑄各項大錢開設官錢局通融接濟福建省亦係瘠苦之區經王懿德查照京師辦法行之頗有成效江蘇情形雖屬緊急豈尙不如福建該督撫若毫無籌畫於錢漕關稅鹽課等款任其逋欠但以一籌莫展空言卸責恐坐待餉需適以自誤朕不能爲該督撫稍從寬典也將此由六百里加緊諭令知之○以崇恩爲福建按察使

由浙江杭
嘉湖道還

○甲寅諭內閣易棠奏請招募獵戶堵禦番賊並試採

金砂以資口食一摺上年甘肅西甯一帶番賊窺伺邊卡節經該
督飭令各屬招募獵戶人等隨時擊退提督索文於察漢俄博營
所管之亦斯們沁地方招募獵戶一千名並令淘挖金砂自濟口
食見在邊疆靜謐辦理業有成效復經該督派委鎮道會同該提
督詳細履勘因察漢俄博營地處卡外南山與甘涼邊界中隔一
山僅於亦斯們沁安設獵戶各隘口尙難兼顧擬請於迤西之野
牛溝迤東之沙金城兩處各招募一千名與亦斯們沁互相堵禦
並因該三處均素產金砂令所募獵戶一半淘試金砂一半防禦
番匪並籌議約束稽查及升科各章程等語近年番賊入卡搶掠
雖經該提鎮等隨時撥兵剿辦往往掩捕不及致令遠颺既據該
督與該提督等查明獵戶人等熟悉路徑用以協助官兵可資得

力著卽照所請於亦斯們沁野牛溝沙金城等處共安置獵戶三千名責成總管練總人等實力稽覈毋令混冒其開採金砂發給獵戶口糧外並酌定課額年限均著照所議辦理○予山東殉難知縣呂升蕃等祭葬世職附祀臨清專祠○乙卯諭內閣官文等奏官兵進剿監利賊匪疊獲勝仗收復縣城一摺逆賊占踞監利縣城經官文等派兵往剿獲勝復派令四川廩生張于銘等帶勇前往協剿四月二十五日守備宗維清督同把總吳鵬程等由中路前進守備福興等在後接應張于銘等由東路前進文生李光榮等由大江水路策應鹽經歷吳振鏞等由西路前進同知湯譽光等督勇接應二十七日於太馬河地方會齊出隊殺賊一百餘名賊匪敗走兵勇追至劉家鋪地方遇埋伏賊匪數千名我兵槍礮齊施鏖戰三時之久轟斃黃衣賊目一名殺斃一百餘名生擒

十五名賊匪敗退入城二十八日復傾巢而出分五路圍撲我兵宗維清等亦分頭迎擊李光榮鈔至賊後督勇登陸掩襲殺斃賊目四名賊匪一千餘名生擒二百餘名撲水掩斃者不計其數其被脅之眾五六百人均卽釋令歸農賊匪大敗逃竄宗維清等當將監利縣城收復三十日復拔營追剿於中車灣地方殺斃空隄築卡賊匪數十名生擒賊目一名吳鵬程等由隄下鈔出賊後復殺斃五十餘名生擒十餘名餘匪竄逸此次殲擒賊目夥賊前後統計共三千餘名溺斃賊匪無數立將縣城收復並燒毀木卡奪獲大礮刀矛鳥槍擡槍多件辦理尙爲得手卽著官文等督飭帶兵員弁紳士乘勝將各路賊匪迅速殲除毋任延蔓○諭軍機大臣等前據袁甲三奏賊船駛擾和州於東門外搭蓋木城慮其負隅抗拒曾經諭令和春等酌量撥兵策應本日據和春福濟奏和

州賊船於四月二十六日全行下竄等語該逆由江浦上駛和州並未大受懲創忽又潛行下竄其中顯有詭謀據稱該州練勇設伏逆匪聞風畏懼恐亦未必盡然前諭琦善酌撥宿遷防兵赴關中一帶未知能否分調今賊既下竄江浦六合又形喫緊且難保其不再竄和州該提督等仍當督飭該州激勵練勇認真守禦一面知會琦善於下游沿江處所設法攻截一面知會袁甲三於上游滁州等處豫籌扼守毋任賊艘來往自如至大營兵勇該提督等屢以無可分撥爲詞總由不能計出萬全以致蕞爾廬城曠持不下著卽迅圖克復卽行分兵沿江進剿以爲奠安全皖之計至所稱廬州南鄉居民薙髮集團攻復桃鎮一節皖省沿江各屬民多蓄髮自因官兵不暇顧問被賊偏脅所致一經示諭卽行薙髮效力是其不甘從逆已可概見朕念其被脅之苦不忍咎其既往

若果能殺賊出力該提督等加以獎賚原無不可總宜妥爲羈縻
堅其歸正之心鼓其自衛之氣使不至爲奸匪煽惑再有反覆舒
城如能克復亦可橫扼廬桐之衝斷賊接應有機可乘萬勿坐失
其六安霍邱等處仍著傳知秦定三設法進攻不得專以扼守正
陽防賊回竄爲詞致成株守將此由六百里加緊諭令知之○諭
官文等奏收復監利縣城一摺此次分督兵勇水陸進攻當將監
利縣城收復斬獲亦復不少辦理尙爲安速其與沔陽江陵交界
地方土匪未靖仍應防其與逆黨勾結煽惑復滋蔓延見旣飭令
參將佟攀梅會同旗營官兵駐守了角驛扼要勦辦務須速籌殄
滅並與守備宗維清等將敗逃餘匪竭力按捕毋任此勦彼竄目
下監利沿江一帶情形較緩所稱俟此股土匪辦竣後卽飭佟攀
梅赴援武昌自係爲慎重根本起見惟天門潛江等處是否尙有

賊蹤安陸荆門兩屬逆勢多寡何如西路獲勝之軍能否沂流而上惟在隨時相機籌辦台湧與舒倫保於收復應山後由德安一路南行爲次第攻克漢陽之計是西南荆安兩路該督等不能兼顧而荆州一郡四圍皆賊若非亟籌剿洗則該郡必致面面受敵前踞宜昌之匪見竄至宜都枝江二縣該處界接楚南貴陞已統帶協領依西布遊擊王國才所領官兵出境堵剿並知縣陳均遠等派帶各勇分路前進扼賊竄路著卽嚴飭該員弁等合力圍剿並飛咨駱秉章等飭屬一體兜撿勿令與湘潭靖港回竄之賊會合勾引致多棘手四川官兵刻下當已趕到著官文相機調遣以資攻剿仍就荆州見在存城兵勇竭力捍禦隨時確探賊情豫籌布置務當計及全局不得顧此失彼致涉疏虞所有帶勇出力之官紳宗維清張于銘等均著先行酌予獎勵以示激勸將此由六

百里加緊諭知官文並諭知慶如貨陞知之○丙辰諭內閣戶部
奏遵議撙節東陵庫款一摺著依議行其西陵廣恩庫用款
並著交綱等體察情形悉心籌擬覈減章程奏明辦理○諭前經
戶部奏請令各省開設官錢局推行官票添鑄銅鐵錢及各項大
錢當經降旨允准原以經費支絀全賴錢法鈔法通流無滯庶足
以利民用而濟時艱乃迄今日久僅據福建山西陝西各督撫奏
明遵辦其餘各省並未將見辦情形奏報該督撫等如果悉心經
理何至遷延一載迄無定章福建素稱瘠區辦理已有成效各省
情形雖有不同亦何難設法籌辦總由地方官吏畏難苟安息玩
因循實堪痛恨著各省督撫將軍都統府尹等查照戶部原奏督
飭所屬酌量地方情形迅速設立官錢局並設法籌款開鑄加鑄
俾錢法與鈔法相輔而行一面妥議章程奏明辦理如有廉能官

吏認真辦有成效准該上司據實保奏以示獎勵將此通諭知之
○諭勝保奏革員李湘棻呈訴冤抑等語李湘棻前在清江浦帶
兵往援徐州知賊匪紮筏渡河並不躡蹤追剿率稱由濟甯一帶
鈔出賊前明係避賊東趨迄未與賊接仗猶以空言入告曾經降
伊頂帶示懲旋稱追賊不及折回豐工徒以所帶兵勇僕僕道途
尙謂江南之兵久防山左並非上策逞其畛域之見行其詐妄之
私嗣將伊頂帶革去責令剿賊乃仍不知愧奮經袁甲三奏參降
旨發往軍臺效力贖罪茲復以沈冤莫雪等詞嘵嘵置辯該革員
防守郝家集當勝保追賊至豐縣時並未見該革員前往協同打
仗其南岸逃竄零匪有徐州一帶兵勇接捕截殺多名亦無該革
員專領一軍擊賊勝仗僅據伊一面之詞謂曾在豐工轟退賊匪
且以專防重地不敢遠離自爲掩飾居心尤屬巧詐李湘棻著仍

遵前旨發往軍臺卽由該地方官迅卽起解毋許逗留○諭軍機大臣等前因僧格林沁奏進攻賊巢情形仍未能得手當降旨諭令迅督各路將弁四面兜擊以期一鼓殲滅近聞該處軍營所以不能得力之故總由帶兵各員不思齊心進剿而僧格林沁空握總統之名不肯破除情面令在必行甚至任令兵丁占居民房營盤之中所餘無幾且所挖之濠盡在北面而南面空虛任賊行走我兵紮營率皆在數里之外虛張聲勢徒費鉛藥似此疏懈耽延毋怪逆匪屢次竄出而僧格林沁毫無知覺總於數日之後始行據稟入奏各路帶兵官員究竟能否用命若積習相沿不遵號令必當從嚴參辦僧格林沁身受重恩非尋常統兵大臣可比亦復何所瞻顧而不肯破除情面將士不能用命卽係該大臣無能之罪雖與士卒同甘共苦亦不過小節微長豈朕所期於該大臣者

著僧格林沁嚴督各路將弁逼近進攻若再以恐傷官兵爲詞不將不肯努力進仗者卽以軍法從事僧格林沁於將弁可以姑容朕於僧格林沁斷不能以姑息示恩僧格林沁撫心自問當亦知之儻日內不能將逆匪殄滅致令又向他處占踞朕亦別無他諭自有懲辦之法至蒙古官兵勤勞久著值此天氣漸炎於水土節候不甚相宜必須及早奏功庶得凱旋休息該大臣務當仰體朕心傳諭諸軍同心協力迅速蕆事共膺懋賞也將此由六百里加緊諭知僧格林沁並諭西凌阿托明阿知之○諭勝保奏進攻情形一摺賊匪占踞高唐州以來已將半月連日未接奏報正深殷盼茲據勝保奏稱於十五日分隊進攻兵勇陣亡受傷者九十餘名見籌趕造攻具並催調兵勇礮位再圖克復是辦理殊未得手覽奏曷勝焦灼該城周圍僅八九里收復本易爲力惟遷延日久

則賊之守衛愈密而我兵之銳氣漸挫且連鎮賊匪時思越濠遠遁若竟全股南竄與高唐之賊聯絡則勝保一軍前後受敵勦辦更致費事經朕疊次申諭豈勝保身在行間竟未慮及昨據僧格林沁奏該大臣咨調之吉林步隊五百名及武成永固礮位已飭令副都統麟瑞管帶卽日啟程濟甯州練勇想亦卽可趕到統計隨營步隊兵勇亦不爲單著勝保督同各員弁迅籌進攻務將州城卽日收復並將此股逆賊就地悉數殲除毋得以竄出之後較易勦殺爲詞致賊蹤蔓延他處至攻戰器具未容拘泥古法所稱製造呂公車是否卽可應用若以此耽延時日更無是理勝保素稱勇往想斷不因小有挫折遂致畏葸不前以兵力單薄藉口也將此由六百里加緊諭知勝保並諭德勒克色楞善祿知之○會國藩奏查靖港餘匪業於四月初八九等日全竄下游岳州以上

見無賊蹤署提督塔齊布卽日先赴岳州臣親督水陸兵勇繼進
自岳州以下卽出湖南地境臣有援鄂之責自應出境剿賊撫臣
駱秉章職任地方難以出境署提臣塔齊布與臣共事年餘實見
其忠勇絕倫堪膺辦賊重任今同奉諭旨統兵東下該署提督自
應卽令遄征無庸稍涉拘泥株守本省其提督印務應否派員護
理抑或帶印出省之處伏候 聖裁又奏見在賊船全竄下游所
有陸溪口倒口金口等處藏泊船隻之所皆被該匪占踞並於口
門築造礮臺兩岸修置土城以陸路之賊守河干之船爲抵死抗
拒之計臣此次整旅東下喫緊固在水路而制勝尤須陸軍日內
將陸勇嚴汰另募添用勁兵以濟勇之不足水師亦重整規模廣
東派來之兵與廣西新招之勇計本月內可以到齊衡州新造之
船與長沙重修之船出月亦可竣工一俟料理完畢臣卽星夜遄

征誓殲此賊以雪挫敗之恥而贖遲延之罪 上諭前此回竄楚南之賊節經會國藩會同塔齊布等於甯鄉湘潭痛加剿洗阻扼兇鋒所有竄踞靖港餘匪見已全數竄往下游是南境情形稍緩而鄂省望援更急會國藩添募水陸兵勇及新造重修戰船既據奏稱已可濟事則肅清江面之舉仍藉此一軍以資得力見在楚北大股逆蹤尙踞漢陽漢口一帶其隨州應山等處匪黨經官軍剿殺後台湧與舒倫保卽由德安一路督兵南趨冀可漸次解武昌之危而由安陸荊門奔突宜昌逆眾復又下竄宜都枝江縣屬賊勢如此延蔓若剿辦再有稽遲東南大局不堪設想塔齊布膽識俱壯堪膺剿賊之任著略乘章卽飭統領弁兵迅速出境與會國藩會合進攻務須酌度機宜隨剿隨進方能次第殲除會國藩與該署提督其辦一事尤應謀定後戰務期確有把握萬不可徒

事孟浪再致挫失該署提督等仍當兼籌全局與官文台湧青麐等聯絡聲威藉資援應所調粵東紅單等船月內應可由海入江已節次諭令琦善向榮飛速迎提分起布置以備汭流而上爲沿江節節堵截之用將此由六百里加緊諭知駱秉章並諭塔齊布曾國藩知之○曾國藩奏臣係革職人員蒙恩飭令督勇自效此後出境剿賊所有一切軍情必須隨時奏報可否容臣專摺奏事之處出自 天恩得旨允行○丁巳 上詣 天神壇祈雨○戊

午諭內閣吏部奏遵議用兵省分知縣改就教職一摺嗣後用兵各省知縣無論見任候補如有自行呈請改就教職者著照部議按其出身應得教職以對品佐雜畱於該省補用以杜規避俟軍務告竣仍復舊制所有此次呈請改就教職之江蘇試用知縣張益卽著以府經歷縣丞畱於該省候補○諭軍機大臣等徐州係

江南重鎮南北要區據黃河之險實力防守足以扼賊往來之路
見在連鎮之賊亟思南竄卽高唐逆匪亦困守孤城糧食火藥無
所搶掠勢難久占大兵圍剿卽能就地斬擒仍難保無零星散匪
捨命南奔復向豐工一帶覓水逃生而廬州之賊尙未殲滅更恐
分股北犯希圖援應是徐州之緊要較前尤甚該處文武員弁果
能與大軍前截後擊更可得手傳振邦署理徐州鎮總兵到任需
時卽著興慶暫行代理該參將距徐較近且係曾經行陣之員著
邵燦等飛飭來徐以資堵禦徐屬練勇七千餘人前此已自請前
驅殺賊士氣尙爲可恃若加以鼓舞振作使與將弁官兵同心剿
賊定能得手況黃流湍急能於南北岸及上下游等處層層布置
該逆豈能飛渡邵燦初膺外簡楊以增久任何防於該鎮道等之
能否勝任均應據實入告如興慶抵徐後未可深倚卽當隨時奏

聞毋稍回護若連鎮高唐之賊被剿窮竄正可迎頭截擊斷不准再任偷渡復肆鴟張該督等務當認真督率毋得稍存大意將此由五百里各諭令知之○以防剿畏葸已革江南徐州鎮總兵官百勝發往新疆效力贖罪○己未諭內閣王茂蔭奏脅從人犯情節可矜請飭從緩定擬一摺逆匪自上年北犯以來到處勾結煽惑其被脅鄉民良莠本自不齊疊經近畿各路軍營及步軍統領衙門五城拏獲形迹可疑人犯均由巡防王大臣等審明虛實覈其情罪重輕分別定擬具奏朕權衡至當其實係甘心從逆之犯斷不能爲之曲宥如係愚民被脅原未嘗概予駢誅亦非以烙印爲惡定爲從逆遽置重典乃該侍郎輒請從緩定擬試思執法貴在持平明愼期無畱獄如使展轉遲延案多積壓轉非清理庶獄之意至所稱各處拏獲人犯先用煙薰取供一節著問刑各衙門

查明如果屬實卽將原摺承審之員指名參辦○軍機大臣恭親王奕訢等奏遵議滄州城守尉福海奏陳查明駐防見存兵丁設法安置章程請將京城正白鑲黃滿洲蒙古四旗二百二十三佐領下各撥馬甲一名移補滄州駐防兵丁缺額從之○署湖南提督塔齊布奏報到任日期得旨汝統師東下以打通岳州速救武昌爲要然一切機宜總應隨時變通汝初膺重寄恐有拘泥諱旨處故諄諄諭及也○庚申諭內閣向榮怡良許乃釗奏遵旨查覆提督陣亡情形一摺上年朕聞江南提督福珠洪阿於江甯省城失陷時奮勇殺賊力竭捐軀當經降旨交向榮等查明具奏並將福珠洪阿先行交部從優議卹茲據該大臣等奏稱上年二月初十日金陵儀鳳門初破該提督帶松江兵三百餘名馳往救應斃賊多名賊卽四竄復聞通濟門危急轉至南門見賊匪大股紛紛

上城與滿漢官兵接仗該提督親督官兵登城迎擊因眾寡不敵身受重傷所帶兵弁大半傷亡勢難抵敵猶復手刃數賊罵不絕口旋即被害福珠洪阿孤忠亮節可憫可嘉著該部查明該員已得卹典應如何再加優卹之處妥議具奏○諭官文等奏收復宜昌府城一摺逆匪於上月占踞宜昌府城經署宜昌鎮總兵訥欽署宜昌府知府吳開陽等統帶兵勇水陸進剿連獲勝仗傷斃賊匪甚多生擒逆首胡得義會大範等七名五月初一日復分路進攻當將府城收復訥欽等乘勝追殺斃賊百餘名並燒毀賊船九隻見在餘匪被剿南竄著貴陞督飭各員弁水陸並進分投堵剿務將此股逆匪悉數殲除毋任延蔓○僧格林沁等奏臣僧格林沁接奉諭旨令查營中積習臣所統各營將士非不精銳惟逆匪所踞村鎮壁壘甚堅各營步隊備嘗艱辛兼之身冒鋒鏑傷亡較

多以致日形懦弱臨敵不免退縮臣亦知法貴森嚴實因所統步隊皆係滿蒙勁旅一旦繩之以法殊覺可惜是以總以善言開導冀其共明大義未忍斬殺一兵惟人數較多惟有籲懇天恩將臣重懲仍令戴罪圖功各營或能知所感惕鼓舞奮興似於軍務有益上諭軍機大臣等僧格林沁勦辦直境逆匪日久無功經朕查知疏懈耽延各情降旨嚴催進兵於督責之中曲寓矜全之意該大臣宜如何感激厚恩速圖奏效以贖前愆乃據奏稱各營步隊倍著艱辛因傷亡較多不免恇怯觀望該大臣不忍繩之以法僅以善言開導仍不能無玩梗之人試思行軍紀律首貴嚴明若以該官兵曾經身冒鋒鏑偶爾臨敵退縮遂置不問各營紛紛效尤何以處之且各路軍營所調官兵孰非久經行陣之人勇敢者實退怯者誅斷難稍涉游移如不能用命卽當查明首先退縮

之人立以軍法從事庶足懲一儆百儻一味姑容致各兵丁習以爲常所謂素稱勁旅者安在僧格林沁總統全軍不能破除情面嚴督馬步各隊剋日攻剿但以焦灼空言懇恩重懲該大臣亦思似此萎靡不振糜餉老師豈屢次請罪所能塞責僧格林沁著先行傳旨申飭各營既經逼近賊壘南面亦不空虛該匪無從逃避卽著該大臣親督大軍實力進剿攻破賊巢一鼓掃蕩將弁官兵中有抗不遵令者無論滿蒙各旗及綠營漢兵卽在軍前正法不得再以可惜不忍等詞瀆奏如該逆仍前竄出致與高唐一股會合惟僧格林沁等是問將此由六百里加緊諭知僧格林沁並諭西凌阿托明阿知之○諭琦善奏遵籌師船布置機宜並懇陳水師疲玩情形一摺旣據該大臣與向榮函商將紅單船隻分提上駛並知會江蘇督撫委員迎赴吳淞卽著飛催辦理見在此項船

隻尚無過浙信息其爲沿途逗畱誠所不免鎮江師船既不得力廣東戰艇又復遷延江面何日肅清覽奏實深焦灼前此諭令該大臣如李德麟等始終延玩卽以軍法從事先就本營得力之員派令管帶俟閩廣鎮將到時酌量更替今覽所奏該革員等狡玩情形實堪痛恨該大臣自稱委蛇隱忍頗費苦衷究竟如何能令振作亦須迅籌良策一味姑容豈能濟事該大臣前於鎮筭官兵不服約束尙能設法駕馭何獨於此項水勇束手無策若不亟圖整頓將來紅單船隻入江相率效尤愈難得力著琦善一面飛催閩廣前調將弁一面嚴督李德麟等剋日進攻疊次所降諭旨已甚明晰該大臣自可毋庸顧慮至紅單船需用口糧前據葉名琛奏由該省紳士勸捐籌辦隨時分解著該大臣迅速咨催葉名琛酌量情形或由海道或由江西轉運赴蘇仍責成怡良許乃釗就

近籌畫以資接濟不得恃有廣東捐項置之不問其火藥一項已諭廣東江西貴州各備十萬斤解赴江南雖不專爲紅單船之用亦可於此款到時酌量分撥該大臣與向榮共辦一事總當妥速會商迅圖克復瓜州再行次第進剿不得專以將弁疲玩爲詞冀可自卸遷延之罪也另片奏請飭索文來營助剿等語此時甘肅調出將弁已多邊疆重地番匪出沒靡常該提督斷難遠離且道路遙遠一時恐難趕到該大臣助剿需人卽著於鄰近省分提鎮大員內擇其夙稱勇敢爲該大臣所深悉者奏明請調數員亦無不可將此由六百里加緊諭令知之○諭官文等奏收復宜昌郡城賊匪南竄一摺此股由安陸荊門分竄宜昌之匪見經該地方官督率兵勇分投攻擊已將府城收復惟該逆被剿渡江南遁擾及枝江宜都並闖入松滋縣境該處逼近楚南本日已諭令駱秉

章迅卽飭令署提督塔齊布會同曾國藩率領水陸兵勇相機迎頭截剿賈陞見飭干總畢金科廩生張于銘先行繞越往截並自行統帶依西布王國才滿漢各軍渡江追襲計所帶兵勇尙不單薄務卽一鼓作氣將此股烏合匪眾無分水陸四面兜擊旣不可使之伺隙南犯尤不可不防其被剿窮蹙復行回竄軍情變幻靡常必須隨時察看何路緊要卽趕赴何路截剿勿令再滋蔓延爲要荊州上游雖已肅清其荊一帶及沔陽潛江各屬是否尙有賊蹤官文於沿江要隘駐兵設防杜賊回竄尤應兼籌西北兩路妥爲守禦四川松潘建昌兩鎮官兵何以如此遲延所有帶兵之總兵雙保福忻著官文等遵照前旨查明如係有心逗畱貽誤事機卽著據實參辦一面仍檄提到營或防或剿均可擇要調遣其川省應解餉銀已據裕瑞奏報啟程並著飛速催提以濟要需至

宜昌收復之後一切撫綏彈壓著卽督飭該地方文武體察情形妥善辦理以期激勵民心藉可協同固守將此由六百里加緊諭知官文並諭慶如貴陞知之○追予江甯殉難在籍已革巡撫鄒鳴鶴道銜祭葬世職○辛酉諭軍機大臣等向榮奏賊擾太平府城聞援先遁並連日攻勦情形一摺據稱逆匪於四月三十日竄入太平府城滋擾經該大臣派鄧紹良帶兵前往截勦該逆聞風先遁竄回金陵已將郡城收復等語太平府城與東壩相通爲入蘇捷徑此次雖聞我兵進勦退出郡城而該逆詭譎異常難保不復圖窺伺且上游賊船千餘隻相率東駛是江上賊船往來自由意在乘隙肆擾此時總以肅清江面爲最要機宜昨據琦善奏水師疲玩情形實堪痛恨已諭令琦善嚴督李德麟等剋日進攻並飛催閩廣前調將弁以備攻勦該大臣與琦善共辦一事如果李

德麟等始終延玩卽當奏參以軍法從事仍與琦善酌量派員更替斷不可稍涉隱忍致誤事機紅單船尙無過浙信息其爲沿途逗畱已可概見著該大臣飛速迎提一俟此項船隻駛入大江卽遵疊次諭旨妥爲布置儻能將江面賊船次第肅清則剿辦自可得手至金陵逆匪雖經我兵連日誘敵仍不過小有斬擒該大臣統領全軍曠日持久不能克復一城師老餉糜罪將誰諉余萬清攻剿鎮江賊匪是其專責據奏節次稟報不過逐日打仗未能克復余萬清本係獲罪之員著該大臣迅速確查如果該革員不知奮勉卽行據實嚴參毋稍徇隱太平府城失守情形並前任學政孫銘恩下落著一併查明具奏將此由六百里加緊諭令知之○壬戌諭內閣和春福清奏剿毀廬州賊營並連次大獲勝仗情形一摺逆匪占踞廬州府城雖經和春等明攻暗襲屢有斬擒而南

門外賊營尙多釘椿樹柵抗拒官兵五月十二日和春福濟派吉順鄭魁士蘇勒芳阿帶領湖南宣化各兵進攻賊營並派何朝亮等攻北門常清等攻東門珠克登等攻得勝水西兩門以分賊勢鄭魁士等冒雨揮兵奮勇進攻直抵濠邊立將大股賊營攻毀適南門突出逆匪二三千人分路來撲和春等令鄭魁士蘇勒芳阿帶兵迎擊立斃賊匪多名追至城下大東小東兩門又各出逆匪二三千人分投奔來欲鈔我兵之後復飭常清嵩瑞德鈞與鄭魁士兩路夾攻餘匪敗逃入城南門外尙存賊營數處鄭魁士等分途攻擊復將賊營三處平毀自辰至申斃賊一千餘名十三日和春福濟復派官兵分攻各門三面夾擊斃賊三四百名其水西得勝兩門亦各出賊匪數百人經珠克登等督率兵勇斃賊數十名該逆敗竄入城匿不敢出逆賊久踞廬城恃南城外營壘以爲恃

角此次經我兵奪毀四處各門斃賊亦復不少該逆大受懲創著
和春福濟激勵將士乘此銳氣迅復郡城毋再延緩○諭易棠奏
隴西匪徒謀逆立時剿滅淨盡地方肅清一摺甘肅隴西縣匪徒
石沅應等聚眾謀逆占踞山堡剗立偽號經告養在籍四川候補
知縣祁嗣唐前往曉諭解散該逆膽敢向前檢裹祁嗣唐忿恨斥
罵致被戕傷斃命該府縣等聞報卽商令護遊擊馬成等帶領兵
勇會同該縣典史許炳輝馳往剿捕祁嗣唐之堂弟告假在籍候
補同知祁兌雇募壯丁隨同前往該逆猶踞堡抗拒兵勇奮力直
前攻破堡牆殲斃逆匪二百餘人生擒首逆石沅應等九名餘匪
自行焚燒堡房紛紛投火自盡復於近村接獲餘犯三十餘名地
方一律肅清辦理尙屬迅速該地方文武各官於匪徒惑眾謀逆
卽時召募丁壯會同兵役悉數擒剿不致蔓延功過尙足相抵均

著免其議處○諭王慶雲奏陝局鼓鑄大錢進呈錢樣一摺陝西
省局鼓鑄當十至當千各種大錢既已漸次流通商民便於行用
著卽照所議辦理其南山一帶銅鉛等礦並准民間開採惟不得
招集外來游民致令奸宄溷迹著王慶雲安定章程督飭所屬認
真稽察以裕鼓鑄而杜流弊○諭奕山等奏據庫爾喀拉烏蘇土
爾扈特副盟長貝子普爾普噶丹呈稱情願捐輸馬匹懇請轉奏
請旨一摺土爾扈特副盟長貝子普爾普噶丹聞內地見有軍務
因不能親赴軍營效力情願捐馬一百匹以備軍需等語實屬出
於至誠甚屬可嘉惟軍營所需馬匹已足敷用著奕山等轉諭普
爾普噶丹伊所捐馬一百匹著毋庸賞收以示朕體恤蒙古之至
意○諭軍機大臣等和春福濟奏督兵焚毀賊營大獲勝仗一摺
逆匪占踞廬州屢經我兵攻勦獲勝此次復焚毀賊營四處大挫

兇鋒惟城外賊營不止此數必須激勵將弁乘我兵銳氣方盛四
路圍攻爲一鼓殲除之計至六安逆匪與廬郡之賊互爲犄角雖
經該署知州茅念劬督率紳勇奮力截擊斃賊多名而州城尙未
克復逆匪仍可往來自如該提督等奏稱必須設法先復六安則
廬州克復較易自係最要機宜著和春等一面迅攻廬州一面知
照秦定三督飭茅念劬激勵兵勇剋期收復六安則廬城賊勢益
孤勦辦更可得手該提督等務當勦力同心相機進勦斷不可再
事遷延致干重罪另片奏各營兵勇其二萬餘名日久餉銀未到
等語本日已諭令袁甲三酌量兩處情形通融辦理其江西河南
所撥皖銀各五萬兩琦善截用皖省銀六萬兩均著分投催提惟
見在各路軍營需餉甚鉅專待鄰省撥解亦恐緩不濟急福濟身
任巡撫仍當於皖省應徵錢糧及淮北鹽課趕緊督催毋得株待

協撥致誤要需至楚勇因領餉不足喧鬧此等刁風亦斷不可長
並著和春等嚴飭帶勇各員妥爲駕馭毋令別滋事端將此由六
百里加緊諭令知之○諭據和春福濟奏廬州各營兵勇二萬餘
名日久缺餉袁甲三甫經截畱銀三萬二千兩茲於山西解到餉
銀路過臨淮又截畱一萬兩所贖無多不敷支放等語見在廬州
勦匪喫緊兵勇爲數較多需餉浩繁袁甲三所帶兵勇爲數較少
自應權其輕重先儘廬州兵餉不得紛紛截畱前據袁甲三奏稱
設法勸諭捐輸已有成數部頒執照亦可隨時收捐以資接濟見
在和春軍營待餉孔亟著袁甲三酌量兩處情形通融辦理以顧
大局當此兵餉支絀之時務當協力同心先其所急庶不至貽誤
事機將此由六百里諭令知之○予甘肅被戕在籍知州祁嗣唐
祭葬世職○以巧飾欺蒙已革河南南陽鎮總兵官柏山發往新

疆效力贖罪○癸亥 上詣 大高殿報謝○諭內閣和春福濟

奏克復六安州城一摺逆匪占踞六安以來經官軍疊次攻剿和春等密飭該署州茅念劬妥爲布置挑選壯勇二百餘人進城與城中百姓約爲內應令各紳勇分路前進距城五六十里紮營並派吏目梁繪事等分帶紳勇堵遏要路本月十五日茅念劬督率紳董舉人李元華等統帶練勇萬餘人分三路進攻賊眾出拒各勇槍礮齊施斃賊無數屍橫遍野將城外賊營全行平毀十六日各勇併力登城砍殺守陴賊匪甚多卽開東門一擁而入該匪由南門逃竄復經茅念劬等督勇追擊將餘匪悉數殲除卽將該城克復該署州茅念劬督率練勇奮勉出力該練勇等同仇敵愾忠義可嘉均應優加獎勵其餘出力紳民及陣亡練勇著和春等分別查明請獎並咨部議卹○諭軍機大臣等和春福濟奏克復六

安州城一摺此次六安鄉團協助官兵奮勇殺賊立將州城克復該處紳民洵屬深明大義殊堪嘉尚亦由該知州等素得民心一經激勵鼓舞卽能人人用命奮勇殺賊和春福濟等惟當加以策勵堅其固守之心藉可協同接剿目下廬州大股經官兵屢次攻擊獲勝逆膽已寒著和春等迅督將士乘銳進攻廬城及早克復一面知會秦定三此時西北情形較緩卽行移兵南向並酌帶劉玉豹忠泰所領各兵近偏南路賊巢探賊所向分投剿辦若能乘勢將舒桐一帶逆眾掃數廓清則廬州安慶之賊自可一鼓蕩平至正陽關霍邱潁上一帶土匪能否斂迹六安收復以後是否仍需兵力均著該提督等相機籌辦如茅念劬始終可靠卽責成該知州辦理一切撫綏彈壓事宜和春福濟仍應通籌南北全局毋令該逆乘虛北竄將此由六百里加緊諭知和春福濟並諭秦定

三知之○諭王履謙長臻奏請將防河出力各員獎勵一摺當此軍務喫緊之際賞功罰罪首責持平此次賊陷永城夏邑後繞道豐工雖未由河南渡口偷越而見在占踞連鎮蔓延東境之賊皆係上年由汜水搶渡而來使當時巡防果屬認真何至縱賊北犯卽謂此次保奏各員不在上年偷渡處所亦應俟河北肅清方能量加甄敘今河防未撤逆賊方張豈能卽加破格之恩致同冒濫各該員中如果遇賊接仗勦辦出力原可隨時保奏卽如單內所開盧朝安一員因帶勇隨同般賊業經降旨以同知直隸州用並賞戴花翎朕於恩施初無所吝總須賞當其功方足以昭激勵所有此次單開各員著王履謙長臻先行存記如能始終奮勉將來軍務告竣南省之賊不至再有偷渡北省之賊不至再有竄回始准將出力各員酌量請獎儻有始勤終怠之員亦卽隨時奏參不

得因有存記之案稍事遷就原單著一併發還將此諭令知之○
甲子袁甲三奏臣查淮北各州縣辦理團練漸有成效惟各練總
僅能分管一鄉儻遇有警卽該練總深明大義不分畛域而事權
不足未必閤境聽其調度是各處團練既有分辦之人尤必有總
司其事者始能聲勢聯絡茲查有靈璧縣翰林院庶吉士張錫榮
蕭縣翰林院編修段廣瀛任事實心可否卽令張錫榮總辦靈璧
縣團練段廣瀛總辦蕭縣團練俟辦有成效鄰境團練亦令就近
督率在該員等固當勉效涓埃力圖報稱卽各處紳士亦必聞風
感奮協力同心矢志滅賊矣上諭內閣安徽靈璧縣團練著翰
林院庶吉士張錫榮總辦江蘇蕭縣團練著翰林院編修段廣瀛
總辦俟各該縣辦有成效後其鄰境團練並著該員等就近督率
○諭軍機大臣等戶部奏邊餉浩繁協撥不繼亟宜變通以期經

久一摺前據奕山等遵議變通新疆兵制及豫籌經費各條經軍機大臣等議以所奏未能覈實請諭令詳細覆奏未據該將軍等奏到見在內地軍務未竣度支告匱所有新疆各城經費及協甘兵餉幾至無從籌撥若非設法變通斷難經久著奕山等各就地方情形悉心籌畫將各城兵制應如何變通所需經費如何設法覈減不至以兵餉匱乏難繼別滋事端此係邊疆緊要關鍵務當通籌全局迅速詳細馳奏毋得互相推諉敷衍塞責一奏了事戶部摺著鈔給閱看將此各諭令知之○諭戶部奏各省協濟滇黔款項不能如期解往請飭該省督撫設法豫籌等語雲貴兩省歲需銅鉛本銀及應發兵餉向俱由鄰省協撥接濟見因軍餉需用浩繁各省應解滇黔款項往往請改請緩卽已經起解者經過用兵省分亦多截留不能如期解往自係實在情形惟該省兵餉及

應辦銅鉛工本俱屬緊要之款若因各省撥解稽遲致誤要需關繫非淺著羅繞典吳振械蔣蔚遠通盤覈算按照戶部所奏添鑄大錢設局開捐並酌減支放各款悉心籌畫酌量妥辦務於協餉未到以前迅速布置豫籌接濟庶不至臨事周章此外或尙不敷用並著照該部所奏貴州則咨商四川雲南則咨商廣東於應撥協餉之外復在空白部照捐輸項下各通融湊撥銀十萬兩先行接濟仍於各省協撥銀內劃扣歸款該督撫等務當趕緊籌辦毋得畏難諉卸專待撥款致有貽誤原片著鈔給閱看將此由五百里各諭令知之○諭勝保奏攻城驟難得手情形覽奏曷勝憤急高唐叢爾州城逆匪不過千餘何以一經踞守進攻卽如此之難據奏西面兵勇業已登城且經奪獲賊旗如果迅速接應何難立時攻入培成那敷德紫營正在西面並不揮兵繼進是何居心且

賊在連鎮卽由培成等營盤撲出追竄踞高唐又屢向培成等列隊處所奔突是培成等始終不能得力實堪痛恨業於摺內批令查明參奏如有心觀望卽在軍營正法該大臣務當破除情面嚴申軍律萬不准稍事姑息致所屬將弁漸啟玩心督催愈難得力所稱製造呂公車尙須數日而我兵又無護身器具似此遷延何日始能了事藤牌檣牌皆係步隊攻城必需之物該大臣在獨流連鎮督攻已久豈能未經備辦卽謂此次倍道南追不能多帶亦何至僅有藤牌數十面又皆不能適用似此耽延時日必致貽誤事機崇恩昨奏城中逆匪多半薙髮暗造青布號衣欲假冒綠營官兵潛蹤竄逸儻我兵攻具甫成而賊已潛遁僅贖空城我兵卽欲追襲亦須處處分撥愈難兼顧該大臣又何以處之地方文武之盤查固不容緩軍營將弁之防禦尤不容疏總宜剋日籌畫立

破州城使逆賊不暇施其詭計方爲妥善至西南兩門官兵旣已偏近甕城焚毀木柵是其地洞通透之處已無遮護或設法塞毀或用火藥填羈均可相機速辦另片奏請撥款接濟軍餉等語見在山東漕折銀兩已准一半解京一半畱備該大臣軍營之用著崇恩再於應解漕折銀兩內酌量撥給以濟要需其撥出後應解京餉若干仍著崇恩趕緊籌解勿任貽誤將此由六百里加緊諭知勝保並諭德勒克色楞善祿崇恩知之○袁甲三奏沿河各匪陸續潛回臣飭派文武督帶兵勇分投捕剿旋經委員徐曉峰等由臨淮泝流至懷遠斬擒要犯多名並查有巨惡吳殿揚上年焚殺劉姓一家十六命後充道署勇頭暗中仍勾結土匪把持河路臣訪聞後卽將該犯誘獲斬首梟示附近居民同聲稱快見在往來船隻夜行無阻此懷遠以下至臨淮之情形也懷遠以上經舉

人滅紆青帶勇按捕至壽鳳所屬之殷家岡一帶先後攻擊水陸
壘獲大勝共斃賊四百餘人旋據該處紳士面稟著名擒首已斃
十一人其餘未獲首匪情願捆獻臣見已出示曉諭解散脅從准
令擒獻首要各犯旬餘以來數百里內賊匪業已斂迹此懷遠以
上至壽州之情形也由壽州之正陽關再上至三河尖百餘里內
閒有零匪並無大股嘯聚已函致提臣秦定三就近飭擊再定遠
土匪猖獗已久近聞擒首陸早魁等三十餘股聚眾八九千人盤
踞壽定一帶並有攻撲定城之說該處距廬州較近尤恐別生他
變見已飭派隨營員弁並廬鳳道張光第督帶兵勇二千六百餘
名分路前往勦辦得旨所奏淮河上下游漸可肅清仍應加意嚴
防不至再有嘯聚方安○命四川升任按察使胡興仁畱辦防堵
命在籍翰林院編修段廣瀛庶吉士張錫榮辦理江南團練○乙

丑夏至祭地於方澤○盛京副都統承志奏查照成案暫停冬園撙節經費得旨著准暫停一年隨時制宜有不得不然之勢而武備尤應隨時講求○丙寅諭內閣刑部奏司員將次銓選援照舊案請留部補用一摺各部由庶吉士散館司員例有銓選本班從前刑部雖有奏留成案然須辦事認真行走有年者方准奏請豈得因曾有成案率行援引本日該部奏請留部之候補主事周道治朱夢元資俸尙淺據稱於刑名例案俱能悉心講求見在周道治卽有承審存豐翻控案內降級處分可見該堂官所稱講求例案者未可盡信且於周道治前案處分並未聲敘更屬含混周道治朱夢元均不准奏留仍著照例銓選刑部堂官著傳旨申飭○諭僧格林沁等奏連日進剿斃賊多名一摺逆匪竄踞連鎮經僧格林沁等移營逼近賊壘二十五日該逆撲出多名僧格林

沁親督各營官兵乘機剿洗斃賊三四十名二十六日復飭派官兵平墊該逆濠溝逆匪大股出巢勢如蜂擁僧格林沁豫派黑龍江總管格綢額帶馬隊數十名設伏該逆離巢已遠格綢額督兵吶喊槍箭齊施斃賊四五十名該逆馬步數百人向我軍攻撲格綢額飛馬當先馬隊繼進將該逆擊回大股賊匪搖旗衝撲我兵各路馬隊一擁直前達洪阿帶兵鈔賊後路復斃賊五六十名該逆仍前抗拒復用大礮向賊眾轟擊斃賊無數達洪阿馬被賊傷復換馬前進我兵勇氣百倍直偪賊隊極力殄剿又斃賊百餘名計兩日斃賊二三百名內偽總制一名紅衣賊四名黃馬褂賊三名該大臣等務當激勵將弁迅殄賊氛毋再延緩○諭青慶奏進攻逆匪大獲勝仗一摺漢口逆船四百餘隻於五月初十日竄赴下游之磯窩地方砌築土城望樓意欲占踞要隘青慶派委都司

周祿等各帶兵勇文已革總兵楊昌泗統帶前往攻剿復派副將書紳等帶領各標防兵續往接應副都統魁玉並飭委協領安貴等酌帶滿兵協剿將該逆土城轟倒該逆齊出抵拒適書紳等兵趕到我軍勇氣倍增復將賊營四處一律平毀並連拋火彈火箭焚賊望臺逆黨勢不能支奔竄回船我兵追至江邊剿捕計殺賊一千餘名溺斃者不計其數並奪獲大船二十餘隻焚毀七十餘隻擊沈三十餘隻礮窩一帶肅清其同日由漢口分撲塘角由鸚鵡洲分撲鮎魚套之賊船經侯鳳岐等疊開槍礮該逆仍冒死前進適楊昌泗由礮窩折回飛調礮船援應青馨亦於城上督開大礮轟擊塘角擊沈二十餘隻鮎魚套擊沈九隻餘船退竄此次逆賊欲占礮窩要隘並於塘角等處駛船分撲均經官兵擊敗大挫賊鋒務當乘此聲威督飭該將弁等將沿江一帶逆匪迅速殲除

毋任盤踞滋擾○以兩廣總督葉名琛捐輸軍餉永廣本籍湖北漢陽縣文武學額各二名○免已革總兵官楊昌泗罪仍畱湖北軍營效力○予廣東潮陽陣亡副將膺保巡檢章坤等祭葬世職○丁卯山東巡撫崇恩奏直東河路未清京倉糧米請暫緩買運得旨所奏尙係實情著照所擬辦理○追賞陣亡江南提督福珠洪阿二等輕車都尉世職○是月緩徵山東臨清等八州縣被擾村莊新舊額賦賑臨清冠縣難民一月口糧緩徵江西南昌等四十應州縣被災被擾地畝額賦並分別蠲免屯濠湖課等款錢糧賞江西浮梁縣被擾難民一月口糧並房屋修費緩山西甯遠等十應州縣買補倉穀和林格爾等三廳縣糧價增昂發倉平糶